

Kontuola

ANTZUOLA / Egubakoitza / 2005ko urtarrilaren 14a / 218. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Txistu kontzertua egingo dute etzi, domeka, osoko bilkuren aretoan

AINTZANE IRIZAR

Berez Gabonetako txistu kontzertua zena urtarrilean egiten dute azkeneko urteotan; aurten ere horrelaxe egingo dute. Bihar, zapatua, izango da kontzertu hori, mezaren ondoren; abesbatzak eta metal boskoteak ere parte hartuko dute.

AINTZANE IRIZAR

Emanaldi berezia bihurtu da Antzuolan urteroko txistu kontzertua. Gabonetako kontzertu bezala hasi zutena urtarrilean egiten dute azkeneko urteotan. Horrela, herriko musikariek ongiatorri berezia egiten diote urte berriari.

Txistuak indar berezia du herrian, baina jaietan eta domeka goizetako kalejiran, batez ere, entzun izan ditugu. Abesbatza, berriz, mezetan, bereziki. Kontzertu horrekin txistularien zein abesbatzaoren lanaz beste era batera gozatzeko aukera eskaintzen zaigu.

Etzi, domeka, egingo dute aurten emanaldia, mezaren ondoren, eguerdi partean, udaletxeko osoko bilkuren aretoan.



Txistulariekin batera, Antzuolako Abesbatzak eta Bergarako Metal Boskoteak parte hartuko dute.

Hantxe, Txistulari Taldearekin batera, Antzuolako Abesbatzak eta Bergarako Metal Boskoteak ere parte hartuko dute. Asteotan entsegutan ibili dira, eta zehaztuta dute dagoeneko domekako kontzerturako egitaraua.

KONTZERTUKO EGITARAUA

Hona hemen domekako kontzertuaren egitaraua: *Goizeko izarra* (Jose Mari Gurrutxaga), *Amayur* (Joakin Iruretagoiena), *Atso Zalduteria* (Raimundo Sarriegi), *Minueto* (V. Monzon), *Tanda de*

danzas (Manuel Delgado), *Mendi aldera* (Isidro Ansorena), *Agur Donibane* (Luis Mariano), *Mendian gora* (Xabier Amuritza eta Imanol) eta *Oi ama Euskal Herri* (herrikoia eta Benito Lertxundiren ahotsan entzun izan duguna).

HERRITARREN HITZA / Karmele San Sebastian • Etxekoandrea

Etxekoandreentzat, noizko gizarte segurantzaz?

Gizartea asko aldatu da, ez dago dudarik, eta emakumeen jarrerak zerikus handia dauka. Gaurko emakume gehien pentsaera ezberdina da adinean aurrera goazenean ondoan; ez dute etxekoandre bakarrik ikusten euren burua, lanbide askotan dihardute. Txalogarria benetan. Ohiokoak dira, hala ere, lanpostu berdinetan emakume eta gizonen artean dauden ezberdintasunak: postu berean, antzik ere ez daukaten soldadak. Hau ez da bidezkoa.

Komentario hauek entzutean, galdera hauek sortzen zaizkit: emakumeen artean ez dago

desberdintasunik? Bai, eta galanta, gainera. Gaur, etxetik kanpo lan egiteko aukerarik ez daukan emakume asko ari da etxean lanean. Beste batzuk, berriz, hala aukeratu dutelako; ume, gaitxo, guraso edo adinekoak zaintzeko, egoitza edota haurtzaindegira eraman barik; horrek dakarren gastu eta loturarekin.

Eta hemen dago gakoak. Etxean gelditzen den emakumeak ez dauka kotizatzerik, ez



"Etxean gelditzen den emakumeak ez dauka kotizatzerik"

gaixo edo zaharren zaintzaile gisa, eta are gutxiago, etxekoandre lez; ez dago ezer erregulatuta. Ondorioa, ulerterraza da: kotizatu gabe ez dago jubilatu pensiorik jasotzerik. Hau ez da desberdintasuna?

Arazo honi buruz, inork ez du deus esaten. Administrazioa isilik, eta nik dakidala, Emakunde ere bai. Goraipatzekoa da familia-ko ez den adinekoak ekartzeagatik etxera administrazioak

ordaintzea, zer besterik, ondo merezia daukate, baina, etxekoak zaintzen dituenari, eskerrik askorik ere ez. Bitartean, komunikabideetan irakurtzen dugu gastu soziala disparatu egin dela, honen arrazoia andreak kanpoan lanean jardutea dela.

Emakunde, emakume langileekin gogoratzen da. Besteok alperrak ote? Andre asko bizi dela egoera larrian biolentzia tarteko dela, eta hori duda barik, lehentasunezkoa izango da, baina beste hau ere norbaitek astindu beharko du. Nire ustez, bada Emakundek egitekoa, zahartzarora duintasunez eta lasaitasunez bizitzeko.

LABUR

Sahararako materiala batzen dihardute

Anelkarrek bultzatuta, Sahararako materiala batzen dihardute herrian. Atuna, azukrea eta konpresa paketeak batu nahi dituzte. Horretarako, hainbat kaxa jarri dituzte Eroskin, Juanitanean, eskolan eta udaletxean. Hilaren 17ra arte dago gauza horiek lagatzeko epea.

Ipuin kontalaria bihar, zapatua, Udal Liburutegian

Bihar, zapatua, ipuin kontalaria izango dugu Udal Liburutegian, 18:00etan. Maite Franco kontalaria etorriko da, eta hainbat ipuin entzuteko aukera izango dute bertaratzen diren umeek. *Ixone ixilik* izeneko liburuaren egilea da, hain zuzen ere, Maite Franco.

Gaztegunea bihar, zapatua, zabalduko dute berriro

Gabonetako oporraldien ondoren, Gaztegunea aurreko asteburuan zabaltzekoak ziren arren, hainbat arazo tarteko, azkenean, oraingo asteburuan zabalduko dute. Bihar, zapatua, izango dute gaztetxoek Gaztegunera berriro joateko aukera. Ohiko ordutegia izango du aurrerantzean ere.

Hil bukaeran inauguratuko dute haurreskola

Haurtzaindegiko lanak bukatu dituzte dagoeneko; orain, altzariak eta eskolako materiala jartzea besterik ez da geratzen. Horrela, Udaleko arduradunek espero dute otsailean haurtzaindegia martxan jartzea. Urtarril bukaeran egingo dute inaugurazio ekitaldia, baina oraindik ez dute eguna zehaztu.

ELKARRIZKETA

OIER PEÑAGARIKANO/EUSKAL HERRIAN EUSKARAZ-KO KIDEA

“Aurtengo gure erronka nagusia izango da herriko osasun zerbitzua euskalduntzea”

A.I.


Euskal Herrian Euskaraz erakundearen 25. urteurrenarekin bat eginez, Antzuolan talde berria sortu dute. Abenduaren 27an egin zuten aurkezpen ekitaldia. Taldeko kide Oier Peñagarikanoren berba egin dugu.

Zelatan sortu duzue taldea herrian?

Beharra ikusten genuelako; alde batetik, ikusten dugu azkenaldian gaztetxoek geroago eta gehiago jotzen dutela gaztelera. Bestalde, kanpotik geroago eta jende gehiago dator eta ardu bat bageneukan. Horrela, talde bat elkartu eta Euskal Herrian Euskaraz sortu genuen.

Zenbat lagunek diharduzue lanean?

Momentu honetan sei bat lagunek dihardugu; dena dela, atek irekita daude nahi duen guztiak parte hartzeko. Oraindik ez dugu egunik eta ordurik jarri batzarretarako, baina egingo dugu deialdia. Borroka honetan denendako tokia eta denon beharra



A.I.

dago. Bestalde, aipatzekoa da gure asmoa dela herri mailako euskalgintza taldea sortzea. Idolaz euskara elkarrekin, Udala eta euskararen alde lan egin nahi duten guztiak talde bat osatzea nahiko genuke; horrela, indar handiago hartuko genuke guztiok. Bergaran badugu horren adibi-

dea: Jardun, EHE, AEK eta Udal Euskaltegia batu eta hainbat ekimen antolatu izan dituzte. Proiektu hori aurrera ateratzea da gure helburuetako bat. Ea otsailean horretan lanean hasten garen.

Non daukazue egoitza?

Udalarekin harremanetan jarri ginen bulego bat eskatzeko,

baina ez digute eman; esan digutenez, ez daukate lokalik lagatzeko moduan. Ea laster zerbitzu lortzen dugun.

Zein da zuen helburua?

Nazio mailan, EHEren helburua da euskararen benetako ofizialtasuna lortzea eta euskaldunon eskubideak bermatzea.

Zuen lehentasunak herri mailan zeintzuk dira?

Herri mailako azterketa bat eta balorazioa egin ondoren, gure lehentasunak zehaztu ditugu eta urte osorako plangintza egin dugu. Horrela, aurtengo gure erronka nagusia izango da mediku euskalduna lortzea edo daukagun medikua euskalduntzea. Gure ustez, horrelako zerbitzu garrantzitsu baten euskarak tokirik ez izatea larria da. Gainera, kontuan hartuta Antzuola nahiko herri euskalduna dela (%80 euskaldunak), euskaldunon hizkuntza eskubideak bermatzeko lan egingo dugu.

Ekimenik epe laburrera?

Hilaren 22tik martxora arte sinadurak batzen ibiliko gara, osasun zerbitzu euskalduna eskatzeko.

UDAL LIBURUTEGIA

Euskadiko Liburutegien Sarean dago gurea

AINZANE IRIZAR

Eusko Jaurlaritzaren Kultura Sailak Euskadiko Liburutegien Sistema Nazionalaren barne dauden udal liburutegien sarea martxan jarri du; Antzuolako ere sare horren barruan egongo da.

Liburutegia sare horretan sartzeak hainbat aldaketa ekarri dizkio liburutegiaren eguneroko funtzionamenduari. Batetik, aurrerantzean bazkide guztiak txartela izango dute; gehienek dagoeneko

jaso dute euren etxean txartel hori. Bestalde, maileguen arauak ere aldatu egin dira; hemendik aurrera, liburuak 15 egunerako hartu ahal izango dira, eta bestelakoak zazpi egunerako. Kopuruari dagokionez, berriz, hiru liburu eta bestelako hiru material hartu ahal izango dira, gehienez.

TXARTEL BAKARRA

Sarean dauden liburutegietako bazkideek, txartel bakarrarekin, sareko liburutegi guztietara sar-

tzeko aukera izango dute. Horrela, edozein liburutegitan materiala hartzeko aukera izango dute.

Gainera, webgune bat ere badago zein liburutegitan zein liburu dagoen begiratu ahal izateko. www.euskadi.net/katalogobateratua helbidean informazio zabala aurkitu ahal izango dugu. Webgune horretan ibili ahal izateko, pasahitza sartu beharko dute erabiltzaileek. Informazio gehiago nahi izanez gero, liburutegira bertara jo dezakezue.

ARDURADUN BERRIA

Aldaketa horiekin batera, beste aldaketa bat ere izan dugu; azkeneko urteotan izan dugun behin-behineko arduradunari, Lourdesi, bukatu zaio bere lanaldia, eta Lierni Legorburuk berritatu du bere lanpostuaren ardura. Urtariletik aurrera liburutegiak izango duen ordutegiaren berri ere eman digute; astelehenetik eguenera 16:45etik 19:30era eta egubakoitzetan 16:45etik 19:00etara egongo da zabalik.

LABUR

Futbol talde nagusiak kopa jokatuko du

Bigarren erregional mailako taldeak Federazio Kopa jokatuko du datozen hilabeteotan. Aurreko asteburuan zuen igoera faserako sailkatzeko azkeneko aukera, baina ezin izan zuen Zestoaren aurkako partidua irabazi; bina egin zuten. Beteixok eta Xabi Azkaratek egin zituzten Antzuolaren golak.

Lagun Onak, Legazpiko Gaztetxea, Gazteak eta Eibartarrak sailkatu dira igoera faserako.

KZGunea bi astean behin bakarrik zabalduko dute

Aurrerantzean bi astean behin bakarrik zabalduko dute KZGunea, Orlanen. Hilabete baten goizez eta hurrengoan arratsaldez egongo da zabalik, eguenetan, hain zuzen ere.

Hil honetan, urtarrilean, hilaren 13an zabaldu zuten, eta 27an ere zabalik egongo da, 09:00etatik 13:00etara.

Otsailean, berriz, arratsalde zabalduko dute, 16:00etatik 20:00etara.

KIROLA

PARTIDUAK

FUTBOLA

Urtarrilak 15
16:00: Antzuola-Axular (Gazteak)

EMAITZAK

FUTBOLA

Zestoa 2 Antzuola 2 (2. erreg.)
Eibartarrak 4 Antzuola 2 (Gazteak)
Antzuola 2 Eibartarrak 1 (Kadeteak)
Elgoibar 2 Antzuola 0 (Neskak)

LARREA
TABERNA
Kalebarren 17
ANTZUOLA

ANTZUOLA
Apainketak eta isolamenduak
Pladurrezko dibisioak
Kalegoi 21 ANTZUOLA
676 997 400
Biltegia: 943 78 70 40

Tomas Gezalaga
Apainketarako eta industriarako pinturak
Paper margotuak
Moketak eta tapizatuak
Kalegoi 21
Tel.: eta faxa 943 76 64 07
Poltsikokoa 616 277 999
ANTZUOLA / BERGARA

GAILUR
taberna eta gozotegia
Buztinzuri 13 ANTZUOLA
Tel.: 943 78 70 32

Tomas Gezalaga
Zoruen kutxilatze eta bernizatzea
Kalegoi 21
Tel.: eta faxa 943 76 64 07
Poltsikokoa 616 277 999
ANTZUOLA / BERGARA